

李文忠公奏稿

李文忠公奏稿

卷之十一目錄

援秦籌辦麥捐摺

同治六年正月初二日

德安接仗張樹珊陣亡片

同治六年正月初二日

請飭何國藩回任片

同治六年正月十九日

徐防兵餉歸併糧臺片

同治六年正月十九日

督軍起程籌度軍情摺

同治六年二月初一日

行抵歸德通籌調度摺

同治六年二月初八日

銘軍尹澂河挫敗片

同治六年二月初八日

進駐周家口籌商調度摺

同治六年二月二十日

奏調何慎修吳贊誠片

同治六年二月二十日

籌軍援鄂請催鮑超前進摺

同治六年三月初九日

所部各軍入鄂賊又北趨招

同治六年四月初三日

請准鮑超在營養疾片

同治六年四月初三日

周盛波獲勝信陽摺

同治六年四月初十日

援陝湘軍獲勝摺

同治六年四月十四日

各軍追賊黃安銘軍迎擊大勝摺

同治六年四月二十三日

賊敗出鄂竄南陽摺

同治六年四月二十九日

瀝陳山東協餉遲誤片

同治六年四月二十九日

賊勢東趨調派追剿摺

同治六年五月初九日

賊過運河移營調度摺

同治六年五月十八日

劉松山援秦壘勝片

同治六年五月十八日

行抵歸德布置大略摺

同治六年五月二十四日

行抵濟甯籌防運河摺

同治六年六月初六日

陳明辦賊大致暫難親赴前敵摺

同治六年六月十七日

劉松山追擊張逆片

同治六年六月十七日

賊入登州抽調運防隊伍摺

同治六年六月二十二日

膠萊河防已定馳赴前敵督勦摺

同治六年七月十八日

劉松山追勦張逆屢勝片

同治六年七月十八日

賊由濰河搶渡相機調度摺

同治六年七月二十八日

李文忠公奏稿卷十一

全集一之十一

桐城災汝綸編錄

援秦籌辦麥捐摺

同治六年正月初二日

奏為酌籌援秦兵食請援浙省減成米捐成案變通辦理仰祈
聖鑒事竊前以鮑超一軍入秦勦捻經曾國藩派委丁憂在籍之
江蘇題補道薛書常商請山西撫臣撥款就地購糧接濟嗣鮑超
回援鄂省復檄總兵劉松山編修張錫燦等軍入關援勦並在陝
州設立糧臺仍令薛書常就近支應臣惟各軍西行不能枵腹荷
戈亦難裹糧前進全賴該糧臺就近覓籌米麩以資接濟西路地
鮮產米麥價亦昂且有錢無市猝辦不及若不豫計購儲必致臨
時缺乏晉省撥款緩不濟急卽金陵糧臺向支該軍餉項轉輾接
運道路既遠難免阻滯現雖由臬司陳澍籌銀萬兩交薛書常在

靈寶縣設局采買然爲數無多亦難源源接濟後路稍不應手前軍立見飢譁亟宜先事籌維多方補救因思同治元年升任浙江撫臣左宗棠因軍食艱窘

奏准援照湖北米捐減成章程就地收捐頗著成效秦中軍務之急無異於浙而餉運之艱有過於浙自應仿照辦理目下賊勢出沒渭華一帶窺晉回豫尙不可定戰事方長軍情萬緊秦晉豫地雖三省事同一家各軍奮勇西行實能裨益全局凡係紳商富戶各宜量力捐輸河北三府及晉豫交界尤稱完善薛書常籍隸陝州情形熟悉且鄉誼融洽必能就地勸助應飭督同各府州縣官紳廣爲籌辦惟是南北情勢不同捐麥則易捐米則難未便拘泥定章查浙省原案凡捐實職虛銜照辦餉例統減四成升銜加級各項向減四成者准再遞減二成捐米一石加耗米一斗五升運

腳銀三錢五分准作捐例銀五兩其願交折色者每米一石連折耗運費交庫平足紋二兩五錢飯銀照費仍照例交納均以庫平足紋上兌概不准搭交錢鈔餉票等項其應歸京銅局收捐各條並補交四成實銀者仍不准收以顧京餉是浙捐雖係減成較之現在河南陝西兩省捐章每例銀百兩折捐實銀多至七八兩不止與其一成不易壅滯難行何如稍事變通來源可旺再四籌度惟有將米捐改爲麥捐原章捐米一石交庫平足紋二兩五錢改爲麥捐一石交庫平足紋二兩雖較陝西尙嫌其昂而與河南不相上下仰懇

聖恩特准援照浙省米捐成案變通辦理

敕部先頒各項虛銜封典及貢監生空白執照一千張飛遞臣營轉發趕緊籌捐以裕兵食而利戎機其有願捐實職者隨時分卯

彙

奏其有外籍民人自願捐輸者亦聽其便至於鄉鄰之人但求衣
頂或情殷報效而力有未充擬由臣刊發五品以下功牌視捐麩
之多寡分等給獎存俟彙咨所有變通捐章籌備軍食緣由理合
繕摺由驛馳陳伏乞

皇太后

皇上聖鑒訓示施行謹

奏

德安接仗張樹珊陣亡片

同治六年正月

再前催各軍入鄂會勦業經馳報在案茲據涼州鎮總兵周盛波等馳稟十二月二十日與總兵張樹珊奉湖北撫臣曾國荃函飭赴雲夢縣境圍擊張樹珊亦同抵應城二十一日黎明又接曾國荃函稱捻逆全股竄近德安距城僅三十里周盛波當由雲夢中途折回向德安前進行抵兩河口搭浮橋過渡行數里又阻淺河未刻突見隔河胡家店一帶賊眾自北而南周盛波揮軍涉河前進迎頭擊之是日劉秉璋所部亦抵該處周盛波與之左右聯絡進剿該逆猛驅馬賊沖突我陣經大小炸礮連環轟擊逆猶拚死抵拒馬賊擊開步賊繼進我軍屹立如牆鎗礮抵擊自未至戊糜戰四時連開炸礮百餘彈斃賊極眾逆始敗潰全股折奔西北我軍迫八九里夜深乃回此周盛波接仗獲勝情形也張樹珊與盛

軍東西分進相隔約二十里是日午後至德安之王家灣適任賴
半李大股踵至軍約數萬張樹珊以游擊日久雖屢挫賊氛恨未
撲滅帶隊速進五六里至新家園見賊屯紮楊家河東岸縣互十
餘里遂分所部六營左右夾進自營副營居中馬隊四面游護我
軍一擁而進鎗礮如雨沖撲過河賊死傷無數紛紛敗潰張樹珊
督隊直追莫得痛斃不意該逆大隊分路回抄我軍力單前後隊
被賊沖斷均在重圍賊騎愈裹愈多各營衝突十餘次出而復入
一而整立營牆復加排擊賊始敗退時已三更各營官不見統領
尋至河邊始獲張樹珊屍身詢據逃回親兵云當賊回犯時該鎮
督副營及親兵苦戰屢陷賊陣被圍核心昏夜莫辨及至親兵二
百餘人傷亡將盡張樹珊猶大呼衝突手刃數賊力盡斃焉賊
所書此張樹珊力戰陣亡該軍先勝後挫之情形也查石江鎮

總兵張樹珊自咸豐四年隨軍在皖北帶勇血性忠篤治軍精強嗣隨勦江浙所向有功歷克名郡該軍向止樹字六營與其兄直隸臬司張樹聲會統其兄以謀勝而弟以勇勝四年春張樹聲赴徐州道任遂令張樹珊專領其眾曾國藩又爲添募步勇兩營馬隊一營轉戰東豫各省屢獲大捷每以兄弟受

國厚恩奮勉報效臨敵勇敢馭下有恩實有古名將之風該部在淮軍中人數最少去冬張樹珊過徐求添馬隊三千誓圖滅賊臣以餉缺未允竊自愧恨此次援鄂臣早慮其打仗過猛寡不敵眾疊經批檄令與周盛波合進一路以厚兵力詎倉卒遇賊與盛軍隔河並戰互救不及軍未敗而身亡追念忠勳慟悼曷已應請旨敕部將遇缺提奏提督廣西右江鎮總兵張樹珊照提督陣亡例從優議卹並懇

特恩予諡准於廬州本籍及立功地方建立專祠以彰忠節其隨
同力戰陣亡之副將劉登朝郭有容都司馬壽文同知銜升用知
縣李輝麟都司銜守備黃瀚均請照原銜從優議卹並附祀張樹
珊專祠所遺右江鎮總兵一缺可否容臣於各軍打仗出力記名
提督總兵人員內遴選請

旨簡放其樹字馬步各營業飭護送張樹珊靈柩回豫再行妥爲
整頓臣接曾國荃二十三日咨函知劉銘傳亦進抵德安會合周
盛波等跟蹤追躡賊已向西北奔竄如仍在京山天門尙可兜剿
若由宋河集走隨州前路無軍攔堵勢將入豫鮑超已回樊城恐
調轉不及等語捻逆本極狡悍行走如飛去秋兩竄東境年饑寨
密無糧可擄我軍乘勢偪之漸形窮蹙此番竄鄂月餘飽掠人眾
官軍飢走疲乏輒爲所乘逆勢復張徒增焦憤除俟各軍續有戰

事再行具奏並飭李昭慶由羅山麻城相機折赴豫境協力堵擊
外所有盛樹兩軍在德安接仗情形附片縷陳伏乞
聖鑒訓示謹
奏

請飭曾國藩回任片

同治六年正月十九日

再湘淮勦捻全軍糧餉軍火專恃兩江疊經曾國藩與臣瀝陳均已仰邀

鑒察年來臣在後路竭力籌畫所屬官吏不稍掣肘湘勇來路較遠人數較少尙可勉發全餉淮勇各軍去年僅能發給九關除積欠口糧不計外以入抵出每年總欠三箇月近日徵調奔馳動輒數千里疲苦缺乏軍心勞怨徒恃臣等恩誼相維各統領約束尙嚴未至譁潰然臣等無日不凜凜迫於時勢不得已也臣今已卸督篆無地方之權卽無籌餉之責昨與曾國藩商議餉源仍指江蘇除外洋軍火米糧長夫車驟雜項絲毫不可缺誤外淮軍餉銀每年至少必須放足九關俾臣得以激厲將士齊心辦賊但以現餉養現軍蘇力已不能獨支若再添募馬隊經費更無所出躊躇

再四相對咨嗟曾國藩久勞於軍所稱衰病情實無捏飾惟感

蒙

聖主倚畀之隆臣復仰體

眷懷以大義相勸勉似可力疾任事捻匪已成流寇蔓延數省勦辦本無把握況臣才智極短深以不能滅賊爲懼仰求

朝廷諒臣之愚忠不責臣以速效臣敢不悉心報稱竭蹶支撐所幸陝甘軍務已奉

旨責令左宗棠督辦左宗棠才力有餘當能制賊潼關以內臣軍斷難遠顧至東豫皖鄂江蘇五省無論何處緊急臣必提師赴援與各督撫和衷商辦稍效縣簿勉顧大局惟長江千里空虛番舶如織游匪橫行自臣去金陵後時恐小有蠢動回顧不及督臣必須常駐省會坐鎮四方曾國藩慮臣照料難周移駐徐州力顧東

路並以回任跡涉畏難取巧具見公忠蓋抱貞介素心臣亦深爲
感敬但臣在江年久審知後路籌餉察吏督臣綜攬大綱不可遠
離臣卽赴豫鄂而東運各防尙有布置遇有捻警亦必令追兵速
來曾國藩卽回金陵臣必隨時隨事虛衷商榷與駐徐調度無甚
懸殊可否仍乞

聖明敕令曾國藩早日回省久於其任則東南已成之局不致敗
壞卽中原方張之寇終可殄除通計天下大勢關係良非淺鮮臣
無任覲幸悚禱之至理合附片陳明伏乞

皇太后

皇上聖鑒訓示謹

奏

徐防兵餉歸併糧臺片

同治六年正月十九日

再徐州自咸豐三年軍興以後設立糧臺飭派徐州道經管收支各款均由該道專案造報因督臣相距較遠詳由漕臣覆核請銷同治三年江甯克復軍務稍鬆經臣火棠

奏改糧臺爲善後局一切軍需仍由徐道收支造報同治四年督

臣曾國藩奉

命督師來徐後設立徐州行營糧臺支放湘淮軍餉及儲運米糧軍械等項仍派徐州道經理去年九月

臣復奉

旨赴徐辦理軍務當即督率徐州鎮道將徐防馬步兵勇從新整頓裁汰老弱添募精壯仿照湘淮各軍營制設立長夫製備車輛並將帳棚軍火等項一一料理整齊改名鳳字營交徐州鎮總兵董鳳高統帶與湘淮各軍一律調遣已於去冬檄令赴豫助勦在

案臣查徐防兵勇既與湘淮合軍則餉項不應再分徐州既另設糧臺則善後局不應管餉同一期捻之師同歸徐道經理而彼臺此局各支各款未免雜出紛歧臣已札飭該道李鴻裔將善後局軍需款目趕於二月內分別清釐相應

奏明自三月初一日爲始將徐防軍餉歸併徐州行營糧臺毋庸由善後局支放該局所收地漕釐捐湖租及各省協餉均由該道提解糧臺照章收支自上年三月該道到任之日起一切收支各款應飭造具細冊移送金陵總糧臺彙入期捻案內詳由督臣覆核奏銷合併之後永遠遵辦毋庸該道專案造報以歸畫一而免歧異臣自去歲駐徐疊據該道李鴻裔以用款甚繁入款太少稟請籌濟查徐防兵食以豫東晉三省協餉爲大宗近年撥解寥寥而徐軍出境助剿遠赴豫鄂較從前需餉尤鉅現既改歸大營糧

支應合毋仰懇

天恩飭下各該省查照舊案撥解臣營以資接濟除分別咨照外
理合會同督臣曾國瀚漕臣張之萬附片陳明伏乞

聖鑒謹

奏

督軍起程籌度軍情摺

同治六年二月初一日

奏爲督軍起程赴豫並籌度大概軍情恭摺仰祈

聖鑒事竊臣交卸兩江督篆後連日與曾國藩熟商兵餉及地方

各事大致粗定疊接鄂省探報鮑超劉銘傳會剿任賴捻股於安

陸府屬之楊家峰尹澧河一帶正月十五日劉銘傳統軍先至迎

擊獲勝追逐四五里因軍中訛傳後面有賊分隊回救賊眾悉力

回犯銘軍挫退兵將頗有折損幸鮑超督隊接應奮力轟擊殺賊

數千大獲勝仗該逆仍向安陸西路竄去又據豫省探報捻股自

棗陽直趨東北二十二日竄至桐柏泌陽交界之平氏鎮勢已東

趨颺疾如風淮湘各軍均已深入楚境一聞該逆竄豫當卽追躡

北來而軍行斷不及賊行之速臣已檄調山東臬司潘鼎新由濟

甯率所部赴豫之尉氏扶溝擇要暫駐臣擬於二月初三日親督

古州鎮總兵劉士奇所部奇字馬步八營自徐州啟行入豫先由歸德至周家口駐紮如途次賊警漸近卽在歸德暫駐相機調度河南撫臣李鶴年兵力本單臣部各軍在鄂者數月奔馳遠役疲乏急切未能趕到銘樹兩營新挫亦須休息整頓再圖進剿目前別無可調之軍曾國藩前檄令鮑超緊躡任賴一股凡在開封以西如南陽許州汝甯境內均與之縱橫追逐如任賴至汝州河陝等處亦跟蹤西行等語實屬切中事機應令鮑超迅督所部由豫西兜擊俟臣部各軍抵豫後再由豫之東路兜擊惟豫中地勢平曠無險可扼賊又善於避兵疾走剿辦殊無把握東徐一帶除防運各營外竟無一枝游擊之師若該逆乘虛闖入臣仍須派兵往來追剿所有督軍起程赴豫並籌度大概軍情理合恭摺由驛馳陳伏乞

皇太后

皇上聖鑒謹

奏

行抵歸德通籌調度摺
同治六年二月初八日

奏為行抵歸德查探賊蹤通籌調度情形恭摺仰祈

聖鑒事竊臣於二月初三日自徐州啟行當經專疏陳報在案途

次承准軍機大臣字寄二月初一日奉

上諭賊數不下十萬鮑超既與賊相持自不能舍而之他著卽整
隊前進會合豫鄂諸軍將此股全行殄滅並著曾國藩李鴻章酌
度軍情如任賴股匪鮑超一軍足能戡事卽令該提督暫紮鄂豫
之交先將此股辦竣軍情且夕變遷朝廷不爲遙制曾國藩李鴻
章務當權衡緩急統籌大局不得置陝事於膜外等因欽此仰見
廟算周詳謀慮深遠曷勝欽悚臣在徐時屢與曾國藩籌商以賊
情而論張總愚入陝一股向不若任賴等股之悍聞該兩逆衅怨
已深勢難久合故張逆避至陝西欲與回匪勾結然回逆自戀巢

穴木必需此黨羽秦地瘠苦多山似張逆終當回竄鮑超卽遠去亦不過驅之回豫耳任賴等股以任柱爲最悍而馬賊獨多自入鄂後虜脅益眾往來中原四達之地剽忽狡譎從不踞寨守城難得合圍痛剿鄂中地形較險是以鮑超尙能因勢獲捷若乘機蹙之與有殄滅之機以軍情而論劉松山十餘營入秦臣等先令薛書常在靈寶設局辦糧又令山西臬司陳澍就近籌濟近以銀米兩缺匱乏時虞若鮑超馬步全軍勇夫二萬人入陝月需米糧更多實屬無力購運該軍若因飢譁潰轉於大局有損左宗棠以疆臣任軍事呼應自靈轉運當較易爲鮑超則客軍也臣等不敢保其遠去不飢乏也竊就日下賊情軍情揆之應仍令鮑超在鄂豫先辦此股爲便臣於初七日行抵河南歸德府連接南路羅山正陽各縣探稟任賴等股自桐柏繞信陽城北之長台關雙井店向

羅山東竄二十八日竄至光山之陳家棚旋折而南竄潁陂河又
由白雀園舊路竄鄂之麻城等語適淮湖北撫臣曾國荃二十九
日函稱鄂軍追賊悉已西至棗陽頃調回東路黃麻堵剿未知能
否趕及是鄂東空虛實甚該處寨少糧多逆眾盤旋肆擾且恐夔
及皖之宿太潛霍爲患滋深臣已飛咨鮑超自樊城拔隊由德黃
山內兼程東下會同曾國荃所部分投截剿如賊趨皖省卽跟追
入宿太境內如賊復由鄂回豫卽由信羅麻黃山會合各軍兜
擊其東面六安英霍岡始潁州一帶並咨安徽撫臣英翰派兵嚴
密堵剿至淮軍援鄂乘璋周盛波兩軍二十七八日已由信陽
赴羅山劉銘傳一軍二十六日抵信陽暫息李昭慶一軍由棗陽
卽赴羅山豫軍宋慶善慶各軍亦進抵羅山現在捻逆趨向未定
擬令霆軍與鄂軍專由山內兜剿淮軍與豫軍暫在山外扼剿臣

於拜摺後卽起程赴周家口就近相機調度仍視該逆所向與各撫臣合力籌辦賊速兵遲總期就地勢一痛懲之所有查探賊蹤通籌調度情形理合專摺由驛六百里馳陳伏乞

皇太后

皇上聖鑒訓示謹

奏

銘軍尹澧河挫敗片

同治六年二月初八日

再直隸提督劉銘傳一軍正月十五日在安陸尹澧河接仗先勝後挫業將大概情形於初一日陳明在案茲接劉銘傳文稱正月十四日由安陸馳抵下洋港探知賊眾厲聚尹澧河與鮑超前約次日分道前進軍由西而東銘軍由北而南以期兩面夾擊十五日辰刻銘軍先至尹澧河望見賊股均紮對岸當將輜重寄放河邊留王德成龔元友兩營護守劉銘傳即督部過河進剿馬賊千餘向北包抄步賊繼進經陳振邦保成等率馬隊擊敗騎賊而步賊亦向南遁我軍馬步分追四五里忽後路驚傳有賊疊次飛報不知係建軍亦由此路進也劉銘傳恐後路有失兩營守護太單復由前敵抽派步隊三營馬隊二營回顧後面賊見我軍抽隊過河悉力回犯劉銘傳以十二營分三路迎剿任逆率眾先撲左

軍牛逆撲犯右軍賴李二逆抵拒中軍中右兩軍尙未交手而任
逆大股已將左軍全隊包裹劉盛藻鏖戰多時漸不能支劉銘傳
當令黃桂蘭張士元李錫增三營暫舍賴李兩股往救左軍行不
數武左軍已敗退過河李錫增見賊追左軍奮力衝擊深入賊中
中鎗陣亡賊卽乘勢擁進復將中軍圍住唐殿魁急率所部援救
詎任賴牛李各股併力包抄劉銘傳親率中軍且戰且退右軍衝
突不出唐殿魁率部戰至河邊殺賊無數賊眾攢圍馬斃墮水與
營官田履安吳維章同時陣亡弁勇陣歿六百餘名賊眾馬步全
行過河跟追劉銘傳督飭王德成龔元友等接應擊退賊敗過河
鮑超乘勢踵進分勦大獲全勝殺賊數千並准曾國荃函稱是日
劉銘傳所部殊死戰頗爲喫力各等情前來臣查劉銘傳勦賊向
稱得力自四年四月親王們格林沁殉節後捻勢猖獗尙賴劉銘

傳督隊苦戰兩載以來屢挫賊鋒未嘗稍敗惟去年三起山東兩入湖北往來徐豫皖各境逐賊而行寒暑無閒該部步隊居多勞苦疲乏遠過他軍該提督血性忠勇平素好戰輕敵曾國濬與臣皆慮飢疲日久或有意外之挫疊經批兩勸戒令其益加持重不料尹澹河之役接仗過猛又因鮑超期會偶誤致有此失幸霆軍援應奮勇再接再厲乘機大捷轉敗爲功該提督經此挫折以後閱歷更增當倍穩慎據劉銘傳自請參辦應否量予薄懲或加恩暫行寬免以觀後效出自

聖裁道員劉盛藻統帶銘左軍先行敗退固屬眾寡不敵究竟督隊不力應請

旨將劉盛藻拔去花翎撤銷勇號仍責令帶隊勦賊至記名提督調補廣西右江鎮總兵唐殿魁治軍嚴整勤勇絕倫自隨臣渡江

東征轉戰數省每陣當先勦勞卓著爲銘軍最爲得力之統將此
次力戰捐軀深堪痛惜記名總兵田股安總兵銜儘先副將李錫
增副將胡衡章劉朝照吳維章候選知縣舉人陳允孚均歿於戰
應併請

旨敕部查照原銜從優議卹唐殿魁並請照提督陣亡例從優賜
卹以慰忠魂其餘陣亡弁勇容俟查明分別奏咨請卹劉銘傳二
十六日追賊至信陽來兩擬稍息數日仍卽躡蹤追勦臣念該軍
勞乏過久新挫之餘批令及時休養整練再圖大舉切不可逞憤
性急所有銘軍正月十五日在鄂境接仗先勝後挫詳細情形附
片具陳伏乞

聖鑒訓示謹

奏

進駐周家口籌商調度摺

同治六年二月二十日

奏爲進駐周家口連日籌商調度情形恭摺仰祈

聖鑒事竊臣行抵歸德曾將咨調鮑超赴鄂先勦任賴等股緣由

於初八日馳陳在案臣於十二日行抵陳州府南六十里之周家

口暫駐催調後路軍裝糧餉緘商前敵各處軍情劉秉璋周盛波

等馬步二十一營於初七日追賊至湖北麻城縣據報賊已東竄

巴河靳水將由廣濟入皖之宿松太湖劉秉璋等卽於初八日由

麻城繞羅田山中進向英山抄出宿太以冀攔賊之頭嗣疊准湖

北撫臣曾國荃咨兩賊於初九十日由廣濟蔓及黃梅宿松邊

界曾國荃擬移駐黃州飭鄂軍彭毓橘劉維楨等馬步四十六營

分爲兩路跟蹤東下會勦臣計劉秉璋等陟山越嶺尙需時日賊

蹤迅疾或由宿太北向潛霍東趨舒桐則皖省腹地糜爛又令李

昭慶王永勝董鳳高等所部由光商進六安會商劉秉璋暨皖軍分投攔擊又令蘇松鎮總兵楊鼎勳帶所部八營由周家口馳往光州探明賊蹤會合進剿總期扼堵北竄就南路山斷水連之處合力兜襲如各軍漸偪漸近數路攻打較易爲功猶恐地廣軍單賊速兵遲該逆復旁逸回竄飛商安徽撫臣英翰多派弁兵赴英霍舒六擇要扼布未知果有濟否昨准鮑超十四日函稱擬遵前旨拔隊由南陽潼關援陝適接臣咨令人鄂先剿東股仍候奉旨定奪臣頃奉二月十四日

寄諭准照所請令鮑超在鄂豫之交相機追剿軍情旦夕變動鄂事近又稍鬆臣復備咨函商請鮑超迅率所部即由南陽取道信陽羅山而至光固屆時無論任賴竄往何處皖鄂何路有警卽行兼程進擊設法兜滅該提督於兵機地勢素能洞悉想可酌量籌

辦臣查東豫游歲饑餽無繼可據該逆知鄂皖交界積穀尙多趁此春荒人山擄脅轉瞬麥熟必圖渡淮北趨而淮河下游自正陽關達臨淮較爲寬深皖省當派峻船節節巡扼將來該逆竄路不由宿霍漸黃回鄂卽由光固六鳳過淮臣現商鄂皖撫臣及各統將欲於江淮之間設法兜圍較得地利但兵力強弱不齊遲速難定未敢謂有把握如果諸軍大集賊未遠颺臣再馳赴皖豫之交相機督辦所有進駐周家口連日籌商調度情形恭摺由驛六百里馳陳伏乞

皇太后

皇上聖鑒訓示謹

奏

奏調何慎修吳贊誠片

同治九年二月二十日

再臣督師勦捻凡聯絡前敵各軍籌辦後路餉運均須得人襄助
查行內閣中書何慎修清操卓識體用兼備廣東候補道吳贊誠
治軍理餉精細樸實以上二員臣所素知合無仰懇

聖恩飭交臣處酌量差委其道員吳贊誠並懇

飭下廣東督撫臣迅飭前來軍營俾資任使謹附片陳請伏乞

聖鑒訓示謹

奏

籌軍援鄂請催鮑超前進摺

同治六年三月初九日

奏爲鄂省軍情緊急籌派各軍援勦並請

旨飭催鮑超力疾督隊前進恭摺奏祈

聖鑒事竊

臣進駐周家口業將籌商調度各情於二月二十日馳

報在案旋接各路探稟任賴捻逆於二月十四五日由廣濟黃梅

竄近皖邊適山西藩司劉秉璋涼州鎮總兵周盛波等統軍由羅

田英山於十五日趕至太湖迎頭攔截兵部侍郎彭玉麟復督師

船駛往安慶江面署安徽藩司吳坤修督勇布置省防撫臣英翰

所部亦分赴潛太英霍堵禦賊卽於十六七日由蘄州蕪水回竄

十八日鄂軍記名藩司彭毓楠督隊在蘄水六神港迎勦先勝後

挫彭毓楠與葛承霖等陣亡業經湖北撫臣曾國荃專摺馳報並

疊函商請

臣處派援臣部各軍先已飭往皖境堵勦因檄令劉秉

璋周盛波周盛傳等由宿太跟進入鄂兼蔽皖省門戶李昭慶馳抵六安卽由商固折回入鄂楊鼎勳行抵光州卽由光山入麻城相機攔擊東北兩路或較穩固惟捻勢西趨鄂軍單弱自彭毓楠挫敗後賊卽蔓延黃岡黃陂腹地有回竄德安之意鄂省西北極爲空虛鮑超久駐樊城營奉

寄諭飭令追勦任賴等股若就近由德安馳赴黃州迎勦最得機勢乃疊准鮑超咨兩因病奏請開缺回籍調養已奉

溫旨慰留臣並六次咨催五次兩勅速援鄂省以顧餉源而維大局昨准初二日來函謂該提督傷病難支已再奏懇開缺並請臣處派員接統該軍等語臣查定軍馬步人數甚多十餘年久戰精銳功績卓著皆由該提督自行募練必須該提督統率進勦呼應方靈臣處實無勇幹大員可以遞派接統咨請該提督仍遵

諭旨辦理並與曾國荃疊函慰勉屬其力疾援鄂又咨請曾國藩一體咨催去後可否仰懇

天恩俯念該提督宣勞最久鄂事正緊飭催力疾統軍由樊城逕趨黃州會同各軍迅將任賴捻股合力剪除再行

賞假調理實於剿捻全局有裨臣仍就現有兵力與鄂豫皖各撫臣酌籌布置飭劉秉璋李昭慶等相機分路穩紮穩進協力援剿冀紓鄂患而慰

聖廬所有籌派各軍並請

飭催鮑超力疾督隊各緣由謹繕摺由驛六百里馳陳伏乞

皇太后

皇上聖鑒訓示謹

奏

所部各軍入鄂賊又北趨摺

同治六年四月初三日

奏爲

臣部各軍先後入鄂援剿賊勢又漸北趨恭摺奏祈

聖鑒事竊臣前因任賴捻股由黃郡西趨催調鮑超一軍就近由

樊城迎剿嗣准鮑超函稱傷病沉重實難支撐聞賊有由安陸上

竄之意擬派霆軍營務處記名提督宋國永與譚勝達唐仁廉會

成武鄧訓誥陳由立楊德珍黃海清等同帶全部出八條岡觀賊

所向商請曾國荃就近調遣並准曾國荃來各捻逆大股麇聚鍾

祥之曰口京山之尹澧河一帶必須霆鄂湘淮合軍三面並進逐

漸合圍再行進剿各等語曾國荃派員省視鮑超病狀據稱伏枕

呻吟難遽強起督隊所部將領無人統率卽暫紮八條岡距安陸

甚遠尙不足以扼要衝緣鮑超傷病屬實未便再四煩催而曾

國荃求援迫切豈忍漠置飭催劉秉璋李昭慶等分起前進李昭

慶二十一日行抵德安卽帶王永勝董鳳高等進扼京山之宋河
劉秉璋周盛波亦由太湖宿松同進斬黃與楊鼎勳會於麻城之
宋埠二十六日進抵雲夢臣又飛飭劉銘傳由信陽入鄂之應山
隨州據報於四月初一二日陸續拔行是鄂省東北兩面兵力已
厚如安陸西北一路果有重兵扼擊庶可就地勢三面兜圍以收
聚殲之效茲接李昭慶二十七日由京山稟報賊由尹澧河郢東
驛洋梓一帶上竄二十五日已竄過安陸府擾及流水溝豐樂河
等處恐由襄棗之間復窺豫境現派開鳳等營馳赴隨州之雙河
扼紮但棗陽襄陽交界無兵攔截賊乘隙北趨駸駸有出豫之勢
臣部各軍一轉瞬間又落賊後可勝焦慮臣本擬遣淮各軍進抵
安陸上下分段扼紮漸偏漸緊辦較有把握臣再馳往鄂境督
籌調度乃兵甫深入而賊又旁逸豫東空虛自須妥察進止昨安

徽撫臣英翰來周口會商軍務臣與面議現屆麥熟捻必回竄皖軍宜整備出境互爲聲援所有臣軍先後入鄂賊勢又漸北趨各緣由謹繕摺由驛五百里馳陳伏乞

皇太后

皇上聖鑒訓示謹

奏

請准鮑超在營養疾片

同治六年四月初三日

再前據遠軍營務處記名提督宋國承暨該部統帶馬步隊各提鎮公稟鮑超病勢加重懇請臣處派員接統等情鮑超續函語意略同當經臣函屬鮑超靜心調理現在進剿緊急如不能親督前往卽就該營將領中自行酌派一人暫代統兵俟調痊就痊再行督勦頃又接據宋國承等二十七日自八條崗公稟鮑超病勢委頓急欲離營醫治請臣就遠軍將領中選員暫代等語臣自咸豐九十年間在曾國藩幕府數與鮑超會晤頗相狹洽遠營各將多未見過嗣臣帶兵東下鮑超轉戰江皖遠隔久遠於該營人材之長短軍情之向背實無由深知底蘊此次鮑超引疾商詢曾國藩曾國荃如何辦法曾國荃覆函謂於遠軍不甚諳悉現請宋國承唐仁廉等統營進紮仍望鮑超病愈親往視師曾國藩鈔示致鮑

超信稿勸其竭忠耐勞力疾治軍永保令名與臣處致書慰勉之意均相膺合臣維目下肝陽當令傷疾易發入夏後冀漸痊復鮑超身經百戰勞傷過重殊堪憫念惟該部三十餘營打仗素稱得力現值賊窺棗襄堵剿喫緊之際似應擇人暫代俾資鈐束合無仰懇

天恩准令鮑超在營安心調養臥護諸將飭就選軍將領中酌派老成勇幹一二員暫行代統進勦由該提督咨明臣處以便加檄飭遵仍俟鮑超病痊親行督率以示體卹而專責成是否有當伏乞

聖鑒訓示謹附片具

奏

援陝湘軍獲勝摺

同治六年四月十四日

奏爲援陝湘軍追剿擒獠各逆連獲大勝現由同州進剿恭摺仰
祈

聖鑒事竊新授廣東陸路提督劉松山一軍自正月初六日在省
西魚化鎮擊賊獲勝嗣卽節節剿賊西上由鄠縣盤屋郿縣追賊
渡渭至扶岐以北無戰不捷茲克銀渠金渠董村臨平等鎮賊巢
並大小堡寨不下百餘處節經喬松年庫克吉泰等

奏報在案連日接據劉松山李祥和稟稱三月十五日攻克臨平
鎮後擒獠悉向武功東竄劉松山等會同黃鼎安住等軍折由大
北溝赴興平截剿十七日抵張楊村馬賊突至各軍督隊猛擊斃
百餘人賊潰竄咸陽一帶十八日五鼓各營疾馳八十餘里至涇
陽之竹范村探知各莊寨打館者均係獠逆遂分三路馳進兜殺

破村寨十餘營賊無數擒逆馬步相繼來撲各營勇氣百倍屢撲屢敗之仍向咸陽遁去計擒斬三百餘名僞元師馬向陽陣斃追奪騾馬軍械甚多陣亡游擊胡長才等二員十九日該逆出馬步大隊距營五六里我軍併力擊走至彭王村楊家莊于家堡一帶圖竄涇河我軍於二十日五鼓先由臨涇渡過河以待該逆果由花池渡宋村渡分數處竄渡劉松山商令黃鼎李祥和分左右兩路率隊疾進而自當中路並以安住全福及彝字順字壽字各營馬隊左右包抄時賊渡方三股之二猝遇我軍縱橫衝殺賊屍枕藉首尾不顧遂大潰奔我軍乘勝追殺至十五里之白楊村傍岸之賊斃水死者數百賊悉向三原富平遁走計共殺斃淹斃生擒約二千人奪騾馬千餘匹軍械無算陣亡都司曹德明等五員勇丁亦有傷亡二十四日我軍追抵富平時賊踞城東王寮鎮一

帶會同郭觀昌進擊賊由北原下竄流曲鎮二十五六等日我軍進紮原邊東西各堡仍分三路進攻該逆蜂擁來撲擊斃悍賊百餘馬賊爲馬隊所斃甚夥步賊見馬賊先敗不敢復撲仍回原巢二十七日各軍進佔流曲鎮鼓噪而前賊出隊死拒各勇愈擊愈奮奪回村堡數十處賊由蘇坊村向蒲城飛竄大荔屬之洛河東岸我軍由蘇坊跟追初一日至晉成堡距河十里賊過河迎拒麾隊擊之收回東岸淹斃甚眾初二日追至距同州十三里之姜彥村林中伏賊突出圍抄我軍之後劉松山督軍奮擊敗竄同州東北此三月十七至四月初二日劉松山等與郭寶昌黃鼎安住等軍併力追勦殲賊巢之情形也初三日劉松山等與黃鼎安在同州城北整隊行八九里探知賊屯許莊小壕各村卽率部分進猛攻賊棄巢遁去我軍整隊欲追忽前而崖頭大起馬賊橫互二十

餘里作長圍包來步賊大隊結數十團分投滾進距營三里劉松
山李祥和與黃鼎各率隊分中左右三路以順字壽字等營馬隊
張兩翼布置方定馬賊已包過陣後步賊分三路冒煙撲來並排
列滾龍車擋牌以避鎗礮各營加勁奮擊盡決無前斃長髮老賊
數百賊三撲三敗復加隊猛衝總兵黃萬友率隊從陣中左路衝
出黃鼎由右路衝出鏖戰半時賊大敗狂奔追殺十餘里餘逆紛
竄謝家坡素羅村小東坡大壕營等處各軍暫紮許莊村擬在同
州購糧跟蹤再進是役其計殺傷斃生擒者約三千人擒獲頭
目鄧立志李老五陳連芳等訊明正法奪騾馬四百餘匹旗幟刀
矛六七千件滾龍車擋牌均爲我得我軍陣亡員弁副將胡理明
等十三員傷亡勇丁一百七十餘名此四月初三日劉松山李祥和
與黃鼎等軍在許莊村續獲大勝之情形也臣查張總愚捻股

自入秦後大肆鴟張去冬秦師屢敗省城岌岌可危曾國藩調派
湘軍於臘杪疾走入關遇賊卽戰每戰必勝數月來會同安住黃
鼎郭寶昌等軍轉戰涇渭之間偏賊東走俾省城危而復安賊勢
張而復蹙有裨於大局匪淺劉松山稟據擒賊供稱該逆商議總
打不過此起官兵將要休息又被追到東西奔竄總無主意等語
是賊勢窘迫可知惟該逆旣竄同州東北逼近晉防據山西臬司
陳湜來稟已商請駐防閩鄉豫軍馬德昭帶八成隊就近過河移
紮老河口而自守禹門以上并謂現在河水漸漲儘力防守提盡
船隻當可不使竄渡臣已批令劉松山等趕速進兵如擒獮循節
陽韓城北趨卽靠黃河西岸節節兜剿遮護晉防如賊由朝邑渡
渭回像卽緊追出關回顧陝洛并屬與陳臬司就近緘商互爲策
應勿使賊得逞志以期漸就殲除該軍歷次力戰捐軀員弁另繕

清單請

旨分別從優賜卹以慰忠魂至各營將士齋糧遠征奮勇用命仰

賴

聖主威福疊戰獲勝勞苦功多此次續獲大捷尤屬異常出力所有統領營官亟應量加獎勵謹繕清單恭呈

御覽應懇

天恩准照給獎以示鼓勵其餘湘軍出力員弁勇丁可否由臣查明專案奏獎伏候

聖裁所有援陝官軍節次追勅捻犯各逆獲勝擬請獎卹緣由謹繕摺馳陳伏乞

皇太后

皇上聖鑒訓示謹

奏

各軍追賊黃安銘軍迎擊大勝摺

同治六年四月二十三日

奏爲任賴等股捻逆由黃安東趨經各軍奮力追剿獲勝劉銘傳
攔頭繞擊大獲勝仗賊又西趨雲應沿途截殺情形恭摺仰祈
聖鑒事竊捻逆回鄂東竄黃孝境內各軍分往追剿業於十四日
附片馳陳在案先是李昭慶遣南嶺鎮總兵王永勝徐州鎮總兵
董鳳高帶隊由隨州赴應山探剿聞捻股自信陽回竄應山初五
日董鳳高率吳鳳柱馬隊馳抵城北忽賊馬百餘衝至城下吳鳳
柱迎剿斃賊數名生擒一名奪馬三匹該逆大隊踵至我軍趕築
營壘王永勝等卽帶馬隊抄擊又斃賊數十名生擒五名並擒首
范守田一名奪馬十餘匹賊敗退十里外盤踞初六日黎明王永
勝董鳳高派六成隊進剿賊卽全股向東南奔竄我軍追四十餘
里申刻至李店賊分股紮住直前猛撲我軍嚴陣以待鎗礮齊施

副將陳福先橫衝賊陣手刃數賊中鎗而亡馬步大隊一擁齊進
逆卽潰竄追十數里斃賊百數十人奪馬十餘匹天晚回駐李家
集該逆連夜竄往孝感小河溪適山西布政使劉秉璋蘇松鎮總
兵楊鼎勳帶隊由應山之廣水驛逕向東追初七日逆眾自小河
奔竄黃安之河口鎮劉秉璋與楊鼎勳追抵小河李昭慶由德安
趕到飛調王永勝董鳳高赴花園改由南路進兜探聞該逆屯踞
河口上下長山寨一帶劉秉璋等率隊直前初九日至黃家橋賊
已整隊迎敵勳營副將李占彪四馬衝鋒首先陷陣楊鼎勳督正
副兩營馳往接應賊紛紛敗退劉秉璋飭左路各營進擊該逆越
山而逃是晚有賊酋胡連發帶二十餘騎投降初十日我軍進至
長山寨賊馬步大股分投拒戰各營鎗礮連環轟擊自辰至午相
持數時副將高森茂首先衝陣奔勇趁勢齊進賊陣潰亂捨斬甚

多奪馬騾四百餘匹賊均退駐河口是夜遁去十一日劉秉璋等拔隊緊追楊鼎勳帶所部八營先行已刻至王家田忽山內伏賊馬步七八千人覘我軍頭隊已過突出邀截總兵張遵道回隊力戰死之楊鼎勳當飭各營結爲方陣將輜重裹入短兵相接弁勇頗有傷亡劉秉璋在後聞信趕派吳長慶況文榜率八營往援兩軍各殊死戰將賊擊退向宋埠竄去此初五至十一日李昭慶劉秉璋等軍在應山黃安境內追勦獲勝之情形也直隸提督劉銘傳初七日抵應山知賊竄河口恐其乘虛由黃州下竄安慶則瀕江腹地俱危初十日馳抵黃陂十二日自紫潼河向北攔截行五十里至黃安紫屏鋪卽見賊騎當整集後隊待之該逆馬步大股正向東走忽遇官軍隔河排紫馬賊千餘竟過河繞我軍之後劉銘傳卽派道員丁壽昌分隊護守輜重令劉盛藻一軍由左路擊

賊步隊副都統善慶馬隊助之滕學義四營並樹軍三營由右路抄賊後陳振邦馬隊助之劉銘傳自率親兵及黃桂蘭五營由中路迎擊賊見我分路出勦亦分路來撲馬賊先經劉朝幹擊敗退過河西劉盛藻督部過河賴逆率眾迎拒馮汝霖丁汝昌擊敗之任逆見賴股西潰卽率馬步悍賊數千直犯滕學義及樹軍隊伍指派牛逆一股迎撲左路賴逆復回拒中路身出馬賊數百繞撲我後馬隊營官陳鳳樓王保勝率部搏戰四五合戈矛相及彼此不分步賊繼進董大義等率隊猛衝我軍鎗礮如雨斃賊滿地賊猶持矛死鬪滕學義等抄山城旁賊始大敗各軍乘勝追殺該逆爬山越嶺相率狂奔我軍分路緊追擒殺數千奪獲騾馬千餘匹沿途解散難民萬餘人追三十餘里至陡山收隊李昭慶正帶隊進分水嶺忽賊大股自東回竄行走甚疾李昭慶督鳳宇武毅十

二營迎頭盛戰賊整隊抵拒王有明以炸礮擊潰賊馬副都統溫德勒克西等帶馬隊迎擊步隊各營排進轟打賊乃奔潰擒殺數百奪鎗械馬匹無數王永勝帶開字十營在後路遇賊倉猝結圍陣迎敵賊以全力抄撲王永勝督廖德旺楊正清等直衝賊陣傷悍賊多名弁勇亦有傷亡各營拚力齊進斃賊數百賊眾奪路向西逃竄生擒七十餘人奪馬六十餘匹救出難民千餘人生獲賊首潘石頭蔡大義等供稱逆首畏兵遠避仍回安陸曰口一帶此十二日劉銘傳馬步攔擊大獲勝仗賊眾西竄李昭慶中途截勦獲勝之情形也據各統領稟報前來臣查任賴等逆在鄂中屢勝之後勢甚猖獗此次由黃安東趨欲由黃州廣濟下竄皖豫經各軍分路追擊劉銘傳攔頭痛勦始折而西王永勝等於途次遇賊奮勇苦戰力遏兇鋒勦辦尙爲得手准曾國荃函稱賊於十四五

日過雲夢應城已趨白口天門等處現催宋國永等帶霆軍由隨州折赴安陸之洋梓扼紮要隘鄂軍回紮阜市天門劉銘傳督軍已赴京山如霆軍能扼安陸竄路仍可設法就地兜圍臣飛飭劉秉璋李昭慶等酌量回軍屯紮以助聲勢惟天久不雨湖河盡涸人馬疲憊誠恐無水不足以限賊無糧亦足以困兵臣當會商曾國荃並督諸將相機籌辦所有銘軍尤爲出力之降補參將董大義吳宏洛擬請以副將儘先補用降補游擊董明禮閃鳳來擬請以參將儘先補用並加副將銜已革記名提督劉克仁經劉銘傳調令隨樹字營進剿十二日之戰愧奮前驅擬懇

天恩暫緩發遣軍臺仍留營協助以觀後效其連日接仗陣亡之勦字營記名總兵張遵道副將李占彪高森茂開字營副將陳福先副將銜儘先參將李洪貴儘先參將謝元勦參將銜游擊孫雲

標升用知縣龔汝弼提舉銜候選縣丞廖得琦馬隊都司趙貴生
千總蕭東江范顯慶外委吳永年均請

旨敕部從優議卹以慰忠魂其餘戰勝出力員弁可否容臣查明
彙保以示獎勵出自

聖裁所有捻股由黃安東趨各軍追剿獲勝銘軍搦頭大捷賊又
西竄白口各緣由謹繕摺由驛五百里馳陳伏乞

皇太后

皇上聖鑒訓示謹

奏

賊收出鄂竄南陽摺

同治六年四月二十九日

奏爲任賴捻股收遁西趨山棗陽出鄂奔竄南陽境內各軍分投
追剿恭摺仰祈

聖鑒事竊捻逆由黃安東竄經劉銘傳等軍連次擊敗折向西趨
業於四月二十三日馳陳在案該逆自十二日痛剿後日夜狂奔
十四日已抵孝感劉銘傳督軍疾追十五日陳振邦派降將任承
清哨官鄧長安馬金敘先率馬勇百餘名追抵雲夢乘夜進擊賊
不及防自相驚潰斃賊數十奪騾馬三十餘匹生擒賊目陳大貴
一名該逆不敢喘息向早市一路奔竄十七至十九等日忽折向
京山由郢東洋梓上竄沿途飢散甚多遽軍營務處宋國永等由
隨州回軍西向十九日抵棗陽之吳家店適賊已由宋家集竄至
平林店關山一帶距該軍二三十里不等二十日商令記名提督

唐仁廉率隊夜襲團山城館斬擒先鋒悍逆數百名奪獲驛馬二百餘匹據各路探稟二十二等日已竄至新野東南之朱集水臺並南陽西南之清華穰東等處邊馬擾及鎮鄧境內擒賊供稱該逆因追兵過緊急竄東豫又有欲逃往陝西等語臣查該逆曾經挫敗窮數日之力奔突出鄂其圖竄豫東蓄志已久惟豫境平曠四達賊情剽譎異常目下既至宛郡或東走葉裕或西趨內浙竄東入陝向未可定劉銘傳由棗陽緊追出鄂周盛波由信陽馳赴泌陽已檄令該兩軍視賊所向相機兜剿豫軍宋慶亦率隊馳往新唐均與霆軍前後聯絡東豫徐亳新麥登場計旬日內可收入秦民食稍易保護如賊果東趨當令潘鼎新劉士奇兩軍會合迎截爲東路援剿之師其餘援鄂諸軍馳逐數月疲乏已甚檄令分道回豫更番休息察度賊蹤再行進戰所有擒股奔竄出豫各

軍迫勦緣由謹繕摺由驛馳陳伏乞

皇太后

皇上聖鑒訓示謹

奏

瀝陳山東協餉遲誤片

同治六年四月二十九日

再山東月協餉處勒撥軍餉銀五萬兩係四年四月曾國藩奉

命北征時戶部奏撥向協餉營之款

諭令按月如數解往不得稍有遲誤自經奉撥報解從未足數五
年二月以後除扣給山東藩司借期新月餉三萬二千兩外每月
僅解徐州糧臺銀一萬八千兩心至月杪起解近則二月分餉銀
遲至四月十五始行報解三月協款尚無起解之期四月則更不
必言臣部各軍轉戰豫東皖鄂等省窮年累月遠道奔波勞苦獨
甚即使協款如期撥撥而轉帳解運尚復需時若報解先逾期兩
月更屬緩不濟急溯查前親王們格林沁督師時各省兵餉皆可
隨便調用山東除月供巨款外一切麩草料軍需捐項均取給焉
此外則晉豫亦多協助今勒撥之餉晉豫力有為難或尙有詞可

諉持東省財賦完善遠過豫省既不能出兵以助剿又不肯出餉
以助兵且賊竄東而臣軍每以全力赴之卽賊出東而臣尚有水
陸四千餘人留守東境運河臣於東省未敢漠視而東省於臣軍
毫無體卹僅此月解一萬八千兩尙且愈窘愈窘臣理太欠平允
難臣如此情形安望其合力辦賊也若不仰求
朝廷垂察苦衷恐以後專任師旅之臣所在掣肘必至貽誤大局
理合附片據實瀝陳伏乞

聖鑒謹
奏

賊勢東趨調派追勦摺

同治六年五月初九日

奏爲任賴擒股被官軍兜勦緊急由南陽奔竄東北勢將由汴入東飭調各軍分投追勦被恭摺仰祈

聖鑒事竊捻逆敗竄南陽於四月二十九日馳陳在案連接各路探稟二十五六七等日該逆由宛郡西竄鄧州鎮平內鄉各境攻破民寨擄掠麥糧駸駸有由淅川荆紫關入陝之勢適豫軍宋慶二十八日由南陽進擊獲勝淮軍劉銘傳由棗陽襄陽緊躡其後二十八日亦抵鄧州二十九日四鼓劉銘傳督隊急馳四五十里該逆盤踞趙家集等處固風棄館向東北逃遁副都統善慶副將陳振邦馬隊迫及之於白龍廟任逆營分馬賊兩路回撲均經我軍擊敗擒斬賊酋李紅山朱五等並騎賊數十名奪獲騾馬百餘匹步隊相繼趕到賊遂狂奔追二十餘里至鎮平縣之馬莊宋慶

率部攔勦復總向東南竄去五月初一日賊至唐縣裕州之交適
周盛波周盛傳山泌陽趕及唐縣小有擒斬賊遂折而北趨初二
三日橫竄舞陽葉縣臨潁之交初四日過許州西北撫臣李鶴年
派張曜出隊攔擊初五六日流竄洧川尉氏中牟一帶山東藩司
潘鼎新在尉氏之張市出隊邀擊賊又折而北初七日潘鼎新聞
拔營追之據劉銘傳擒賊供稱賴李兩逆本圖竄陝任逆因郟城
梁山寨有土匪勾引欲速赴東裝旗等語豫境平原四達無險可
扼該逆避兵急趨日夜東走其爲竄東無疑臣早料及此疊經奏
明有案惟自冬徂夏逆眾久擾鄂中不得不催調全軍赴鄂協勦
稍慰鄂人之望迨賊出鄂而臣軍俱已深入又不得不落其後堵
禦無術愧憤徒深劉銘傳前在信陽整練兩月銳氣甫復尙能與
賊馳追東自應山黃陂西出安陸襄棗頃又由南陽追至鄭汴日

行百里該逆雖望風奔逃而軍士亦冒暑疲乏臣令其追抵曹州
暫行屯紮察度賊情地勢再行合力兜圍賊過蘭考巡趨曹濟圍
撲運河水係歷年慣技茲天久不雨河水枯涸臣先派有總兵徐
道奎水師一營駐防濟甯以下之南陽湖昨據稟報自新店至新
聞水不盈尺南陽湖至谷亭十八里竟成乾壩人馬暢行礮船無
可施展賊若由此逕犯鄒滕則運防成局礙於一旦實爲可慮據
潘鼎新來函業經緘商撫臣丁寶楨未知其有無布置也臣飭潘
鼎新如賊入東卽緊臨前往與運防水陸各營妥籌策應又徐州
防兵甚單江境運河亦涸恐賊乘虛下竄已飛咨兩江督臣曾國
藩商令長江水師提督黃翼升迅率礮船馳赴清江徐州一帶會
督水陸嚴密巡防又派昭通鎮總兵沈宏富代統奇字馬步八營
由周家口拔赴歸德相機截堵如賊已東竄卽由虞城赴豐縣扼

勦與劉銘傳潘鼎新聯絡聲援仍俟劉秉璋王永勝楊州勦董鳳
高各隊由鄂回周口後整頓休養再酌飭前赴東徐就地布局設
謀制賊臣當隨後馳往督辦所有捻股經各軍兜勦由南陽東竄
汴境勢將入東調派追勦各緣由謹繕摺由驛六百里馳陳伏乞

皇太后

皇上聖鑒訓示謹

奏

賊過運河移營調度摺

同治六年五月十八日

奏為捻逆狂竄東境由鄆城梁山東北戴廟突過運河東省震動
臣自周口啟行先赴歸德察度軍情相機調度恭摺仰祈

聖鑒事竊任賴捻逆由南陽奔竄勢將由汴入東業於初九日馳

陳在案該逆初七日由朱仙鎮竄過陳留闕考初八日即入山東

曹縣境內銳意北趨颶疾如風初九日定陶城武徧地賊氛頃

據駐防濟南南陽湖水師提督徐道奎飛稟該逆十一日竄至鉅

野十二日由鄆城梁山折竄戴廟探聞是日午刻突有賊馬數匹

衝進運河東岸圩牆將東軍統領精捷營總兵王心安等營軍裝

盡行搶擄遂擄船搭橋搶渡運河該處河道係東省水師總兵趙

三元分防地段距濟甯一百數十里等情並據單縣金鄉濟甯州

探稟前來其過河後竄東竄北尙無確耗並未接准山東巡撫咨

會而各處稟報門臣接閱之下憤懣憂惶莫知所措從前價格
林沁督師運河水經設防捻眾往來自若官軍馬隊甚多尙可隨
時馳逐迨何國藩接辦因湘淮各勇募自南方素無騎隊步軍笨
重往往緩不濟急乃議於運河東岸沿隄興築長牆嚴堵竄越則
援剿較易爲力濟甯以上責令東軍分守臺莊以下責令清淮各
軍分守其濟甯南至臺莊一段閒以湘軍水師淮軍陸師補其闕
兩年以來捻逆屢次猛撲未能竄過前撫臣閻敬銘疊奏有案保
全東省完善兼固畿南藩離實於大局有裨自臣接任勦匪任賴
等股遠竄鄂中臣不得不率全師赴援去冬卽與閻敬銘緘商以
東境運防自黃河以南申家口戴廟至濟甯石佛趙村共不過二
百里有運河可阻有長牆可扼東省財賦較可贍軍應專任本省
運防而騰出前駐濟甯之潘鼎新張桂芳淮軍作爲游擊兼顧他

省各督撫自守汛地俾臣得專力援期庶免處處牽掣閣敬銘復
雨頗以爲然卽丁寶楨亦稱濟甯新店以上由東軍認守臣方慮
徐道奎所紮南陽湖一帶水涸易渡不料賊直撲運北之戴廟該
處東軍水陸兵力尙厚竟不能爲一日之守廢弛貽誤誠可痛惜
臣方檄調劉銘傳潘鼎新周盛波王永勝沈宏富董鳳高各軍分
赴曹單豐徐舊河隄聯絡扼紮並密商豫軍進紮蘭考皖軍進屯
蕭場同時興工圍築冀燧賊於黃運之間就地勢以圖圍困潘鼎
新劉銘傳於十二三日馳抵單縣諸軍未集賊入東甯四日而卽
撲河撲河未半日而卽搶渡機會頓失局勢又非查賊旣過河東
而濟泰登萊南而究沂海嶺儘可任意流竄潘鼎新劉銘傳已拔
隊過河追勦惟張秋濼口二鎮尤係北竄要津渡口船隻較多該
處當有防備臣深爲懸系拜摺後卽由周家口放行先赴歸德察

度賊情相機進止一而提催各軍就近調派但軍士久役酷暑疲病未知能否補救於萬一實深悚慮合無仰懇

聖恩飭催直隸督臣於張秋以東黃河北岸趕速擇要嚴防以杜該逆乘虛窺竄所有據探擒逆由戴廟竄過運河臣由周口移營日期理合繕摺由驛六百里加緊馳陳伏乞

皇太后

皇上聖鑒訓示謹

奏

劉松山援秦壘勝片

同治六年五月十八日

再劉松山一軍自三月十六至四月初三日節次剿擒獲勝臣於四月十四日彙摺具陳在案該逆向同州東北竄踞大壕營小東坡各堡四月初六日劉松山李祥和會同黃鼎安住全福各軍夜襲其巢殺斃數百人該逆折渡洛河西竄富平一路初十日各軍分路攻奪流曲鎮及各村堡由富平西北文川圍一路追剿十七至二十等日攻奪三家莊新堡蒲溪鎮等處賊巢並村堡二十餘處連日共斃賊六百餘名該逆折由東南郭公祠一帶渡渭向郿縣境內奔竄該提督等恐其東擾省垣亦由咸陽過河橫截二十四日進擒元其寨殺祿莊賊巢圍殺馬賊七八百連奪村堡十餘處適郭寶昌一軍亦到復分路追至省城南山門口是役斃賊約共三千並頭目多名生擒八百餘救出難民七八千人奪騾馬一

千五百餘匹二十七日各軍由灞橋追至新底鎮詎該逆因潼關有備不敢東竄折沿渭河西趨五月初一日又敗之鄂縣少義坊小有擒斬遂由盤屋橫出郭公祠竄渡渭北蒲溪鎮桑家莊一帶初三日該軍亦由塔耳寺過河抵張家村賊大隊來撲奮勇擊退迺回原處據劉松山等疊次稟報前來查該逆屢經痛剿奔竄渭河南北窺晉不遂回豫未能賊勢日窮趨向難定已批令劉松山會商各軍相機追剿設法殄除勿任得再逞志其元其寨陣亡藍翎參將汪明理花翎游擊胡光亮應懇天恩敕部從優議卹以慰忠魂所有劉松山會合各軍節次剿擒獲勝情形謹附片具陳伏乞

聖鑒訓示謹

奏

行抵歸德布置大略摺

同治六年五月二十四日

奏爲行抵歸德察度賊情調派布置大略臣即進駐濟甯兼顧南北相機籌恭摺仰祈

聖鑒事竊任賴捻逆由東境藏廟搶過運河臣先赴歸德就近調派各情業於本月十八日馳報在案是夜臣帶親軍馬步隊冒雨啟行二十二日馳抵歸德途次欽奉十七日

寄諭著卽移營東境擇要駐紮居中調度等因臣初慮捻逆過河如循汶上鄒滕舊路下竄嶧邳則徐淮喫重臣當進駐徐州如由泰安濟南東竄青萊則東境喫重臣當進駐濟甯皆須由歸德分路也二十一日在栢城行營接據丁寶楨潘鼎新函報十四五日賊已竄往泰安潘鼎新由單縣兩晝夜馳抵濟甯添備糧藥卽由滋陽曲阜向泰安追剿劉銘傳十七日在單縣隄上得信是夜亦

拔赴濟甯候餉到營卽向東進發臣聞守運東軍全調往剿恐賊乘虛回竄飛飭周盛波周盛傳等由曹縣拔往濟甯之長溝擇要堵扼又恐賊由泰安折竄沂海則清江裏下河門戶可虞飛飭王永勝開字營由單縣沈宏富奇字營由徐州均拔赴宿遷暫紮董鳳高鳳字營孔昭石華字營併扼韓莊要路豫備南路援剿劉秉璋李昭慶援鄂甫回周口臣合劉秉璋一軍卽赴濟甯休養再候調遣現派南路各陸軍令臣弟昭慶馳赴徐州宿遷察看緩急會商黃翼升水師相機防剿日內劉秉璋李昭慶均可抵宋臣與面授機宜卽日督隊由虞城單縣金鄉逕赴濟甯兼顧南北軍情居中策應據探報該逆分爲兩股一往甯陽迤北奔竄一向萊蕪青石關奔竄接萊蕪縣稟報十五日已竄至該縣西毛埠村等處揣度賊情似向青州一路目前可無虞北竄劉銘傳播鼎新向有

濟人心萊海隅趁勢制賊奔竄徐圖聚殲之議此次復中前
說請上商湖皖豫各軍出境協守東蘇運河西岸杜其回突銘鼎
兩軍會合東軍再於東三府等處相度要隘步步逼緊使其一入
不得再出卽或逸出仍與往來追躡蹙入海隅而止等語查捻賊
已成流寇偪之不流然後會師合剿原係殄賊上策明臣孫傳庭
謂須驅之於必困之途取之於垂死之日如第一彼一此爭勝負
於矢石之間卽勝亦無關於蕩平實爲剿辦流寇篤論臣去冬十
一月開奏稱須蹙之山深水複之處棄地以誘其入然後合各省
兵力三四面圍困之亦是陰師其意本年三月左宗棠督國荃商
就湖北襄河東岸白口地方設圍困賊五月開臣又擬就曹單豐
碭黃河舊隄分段布紮冀蹙賊黃運之間皆欲就地勢以圖兜圍
無如賊蹤颺疾兵力未齊瞬息百變竟未辦到茲賊既深入東境

臣軍久役疲乏斷不敢謂蹙賊海隅之議遂有把握但與其任令長驅各省流毒無窮似不若誘令盤旋偏隅得辦且辦臣已密屬潘鼎新劉銘傳儘力追蹙如果賊竄登萊我軍卽於膠萊咽喉設法扼信使北不至竄入畿疆南不得蔓延淮海局勢自較緊湊臣並緘商李鶴年酌調張曜宋慶兩軍進紮汶上運西開河一段英翰酌調張得勝黃秉忠程文炳各軍進紮宿遷至灘上運河西岸以備接應前敵張之萬酌調成子河防軍及淮揚鎮水師移防清淮及阜甯之射陽湖以杜窺竄裏下河之路各督撫素顧大局諒無不竭力籌維惟事機倉猝賊勢僥悍地段太長恐有力不從心之處臣姑懸擬大略借助各軍其賊蹤是否遲趨登州膠萊能否阻扼各軍能否趕及運西能否徧防應俟隨時察商辦理未便預爲限制如以上兩策皆辦不到亦惟有抽派各軍輪替進剿以圖

偏賊早回運西再行相機酌辦再臣自周口起程後日日遇雨農田渥澤均霑秋禾可期暢茂合並附陳仰慰

聖廡所有行抵歸德調派布置大略仍卽進駐濟甯各緣由謹繕摺由驛六百里馳陳伏乞

皇太后

皇上聖鑒訓示謹

奏

行抵濟甯籌防運河摺

同治六年六月初六日

奏爲行抵濟甯後調派各軍分路兜剿並籌商運河防務大概情形恭摺仰祈

聖鑒事竊臣前過歸德察度布置疑先守運河蹙賊海隅各情於五月二十四日馳報在案二十五日劉秉璋李昭慶帶隊由周口馳抵歸德臣分飭劉秉璋隨臣往濟甯料理東境運防李昭慶趕赴徐州宿遷察看蘇境運河督催淮軍各營與皖軍聯絡扼紮臣卽於二十六日由宋啟程二十九日行抵濟甯與劉銘傳晤商一切適接潘鼎新二十七日追賊至長山稟報捻逆已過濰縣其勢似趨登萊劉銘傳卽督所部於六月初一日由濟拔行由泰安萊蕪徑趨青州爲中路潘鼎新由濰縣昌邑赴萊州爲北路又派徐州鎮董鳳高昭通鎮沈宏富馬步十五營由郟城蘭山進莒州爲

南路三路兜截而前欲僞入登萊絕地會合東軍相機扼堵如能扼之於膠萊河一帶使其不能復出臣再抽調運防各軍輪往替紮更番進擊如各軍尚未到齊或布紮未定而賊已回竄劉銘傳等相機兜抄臣督運防各軍隨地攔截使之不得遽竄運西仍須整入海隅乃有殲賊之一日欽准山東撫臣丁寶楨咨函亦以登萊三面距海河渠環錯山徑崎嶇馬賊無可駛騁亟思就地剿除與臣等意見相合惟任賴各股竄粵逆擒匪百戰之餘兼游兵散勇裒脅之眾狡猾剽悍未可易視若兵力未足兜圍而追之過緊畫地過狹使其窺破機關勢必急圖出竄稍縱卽逝全局又非故臣必先布運防以杜出路次扼膠萊以斷咽喉其追賊之軍未達膠萊則須急進以逼蹙之既達膠萊則宜聯紮以圍困之業將此意緘復丁寶楨請其至平度州後與劉銘傳潘鼎新察商就地布

置無論能否堵住而制流賊之法必先能堵而後能勦也連日接
准河南撫李鶴年函復已派張昭來慶兩軍出省協守東境連
河軍令該軍分紮東平以上靳口至黃河沈家口百餘里周盛波
分紮開河至靳口一帶劉秉璋分紮濟甯至開河一帶楊鼎勳分
紮趙村石佛至南陽湖一帶又准安徽撫臣英翰者復已派黃秉
鈞英字一軍赴宿遷運河向上游扼紮張得勝凱字一軍赴貓兒
窩灘上向下游扼紮程文炳強字一軍居中策應並調水師三營
人運巡護英翰擬隨後親往督率等語臣飭李昭慶卽督所部由
灘上黃林莊接守至韓莊八閘一帶如此部分大段略定各軍先
後報到趕緊興築士氣尙爲奮發但冀一月之間賊未竄出運防
可漸就緒臣擬仍商調湖北防軍萬人出境酌換運防再替出勁
旅一二枝入東兜擊如果運西固守則皖豫鄂蘇腹地稍安祇此

東海偏隅道遠兇閉施功較易區區慮虛非敢謂遂有把握然事勢至此欲就地利合人力以謀之未便畏難自阻也李鶴年函稱豫軍全調出境恐張總愚由秦回竄惟荆紫關尙嫌空虛伏讀五月二十三日

寄諭左宗棠現已督軍分兩路入關著卽與陝省兵勇夾擊兇圍迅將此股在陝殄盡免致流入鄂豫等因仰蒙

洞燭幾先曷勝欽服左宗棠劉典分進潼關荆紫關似已周密其潼關閭鄉一路豫省已有守兵可否

敕下左宗棠酌留數營嚴扼荆紫關使張逆不得乘閒逸出庶陝軍可以就地殲除臣等專辦東賊亦無後慮再臣既設防進西其直隸開州大名等處防軍專備曹邨渡河之路似可無虞將來賊若撲進不動難保不折而窺黃張秋地當衝要防兵甚單可否

救下直隸督臣轉飭臬司張樹聲暫移所部進紮張秋北岸一帶
聯絡東軍嚴爲布扼且與臣軍隔河聲息相通策應較便實於全
局有裨所有行抵濟甯後調派各軍分路兜剿並籌商運河防務
大概情形謹繕摺出驛五百里馳陳伏祈

皇太后

皇上聖鑒訓示謹

奏

陳明辦賊大致暫難親赴前敵摺

同治六年六月十七日

奏爲陳明

微臣

辦賊大致及現在情形暫難卽赴前敵先令劉銘

傳就近妥商調派恭摺仰祈

聖鑒事竊承准軍機大臣字寄六月十三日奉

上諭丁寶楨奏追賊獲勝並布置扼勦一摺東省兵力未厚劉銘傳董鳳高沈宏富等軍須星馳前進立爲聲援庶足以杜回竄又恐諸將會合呼應不靈防勦機宜間不容髮著李鴻章卽星夜馳赴前敵就近調度以期呼應靈通迅殲孽醜等因欽此查臣前商調皖豫各軍協守運河西隄派令劉銘傳潘鼎新董鳳高沈宏富等三路前進備賊膠萊會合東軍相機扼堵等情雖經於五月二十四日六月初六日具奏在案茲

諭旨飭

臣

速赴前敵迅圖殲賊而

臣

調兵未集布防未定不得不

將臣懸擬辦賊大致及現在情形爲我

皇太后

皇上詳悉陳之自來流賊最難追勦而賊流之速尤莫如今日之
捻逆中原平曠萬騎沖突無可限制日輒百數十里或二百里無
論我軍步隊笨滯力不相及即使及賊見仗而此截彼竄橫行側
出賊路不窮我力必有時而窮迨日久追逐疲憊爲賊所乘往往
一蹶不振自勦捻以來十數年如一轍雖追賊神速如僧格林沁
尚且不能成功臣等自問萬不能及故欲滅此賊計惟有覓地兜
圍之一法臣曾屢奏及之曾國藩始思變計初議四鎮之設繼議
沙河賈魯河之守本年春閒左宗棠曾國荃又擬爲白口之圍皆
欲備之不流蹙之漸緊也自臣受事抵豫賊已入鄂各軍與賊轉
戰鄂豫數月迄無機勢可乘惟有嚴檄諸軍往來躡擊智術短淺

實無解於

朝廷之責備追賊由豫竄東臣思東省運防屢經賊撲向稱可恃遂急注意布扼曹單豐碣舊河隄欲困之運黃之間以爲得地乃不數日而賊已渡運臣由歸德馳赴濟甯與劉銘傳等兩商不得已復爲蹙賊登萊之計先借各省兵力協守運河西隄以圖圍制而遏回竄續奉六月初五日

寄諭鈔發劉長佑英翰等原摺皆言之甚切與臣所部署均屬相符是目前辦賊舍此竟無良策臣更衡量利害之重輕與其馳逐終年流毒江皖東豫楚各省不如棄一隅以誘之與其往復運東濟秦充沂青及蘇之淮徐海各屬均受其害不如專棄登萊以扼之膠萊河之守不密則登萊無可扼運河之守不密則膠萊仍不足恃賊蹤已向膠東事勢至此機會可圖但求萬全不爭一日故

臣立意必運隄與膠萊河兩防均已布定乃可抽兵進剿庶打一仗是一仗滅一賊少一賊賊智自困而兵力不疲明知此計至愚至拙亦至難然不若此更不足以制賊彘經緘商丁寶楨屬其勿遽窮追反驅出境卽兵力未集而迫之過緊使之窺破機關轉虞脫逸並告以壁之一字宜求實濟勿尙虛鋒恭讀六月初四日寄諭丁寶楨宜妥籌兼顧杜賊回窺不可專事尾追致賊延蔓等因尤服

聖謨之炳照臣惟日夜圖維先固守局而後進兵此臣籌辦之大致也東蘇兩境運隄袤長千里苟非各營撫關顧大局通力合作臣軍斷不敷用皖豫派到各軍與淮軍分守宿遷以上地段臣前已奏明現今於西岸排築長牆分哨過運東就舊牆修繕礮臺掎角護守方漏夜興工非月餘不得牢固而宿遷以下至清江運隄

幾二百里尙無守兵漕臣張之萬兵力止能自保蘇省防軍無可再調上值調前金門鎮王鍾華提督魯洪達水師三營分布宿遷寧濟開下至鹽河箝口塘一帶但苦無陸師依護欽奉初五日咨諭復經面商浙江撫臣馬新貽請其速派五千人北上協守宿遷桃源運隄以補其隙尙未接復據准李瀚章曾國荃咨稱已派提督譚仁芳總兵劉維楨率萬二千人劉長佑咨稱已派臬司張樹聲率總兵余承惠等四五千人前來助守均尙未得起程日期故運防猶未布滿卽暫無兵替入膠萊至膠萊河距南北海口潘鼎新函稱二百七十里丁寶楨則云約三百里以每營三里計之須百營布守至少亦須八十營劉銘傳等三路之師日內先後已到然步隊止四十六營臣復擬調豫軍宋慶十二營淮軍王永勝開字十營由運河續行抽往必合之丁寶楨所部東軍三十一營

始可密布丁寶楨止允以十一營相助而臣添調運防之宋玉兩軍又須牆工稍就乃可拔隊若丁寶楨盡以東軍協守目前略可敷用未知果否准行連日據報賊蹤盤旋萊陽掖縣仍向東北駛竄臣飭劉銘傳等如賊外向當設法堵入並商請丁寶楨移營分扼若膠萊之守未成卽未能銳意擊賊若賊或竄出膠萊諸將必能跟蹤急追臣雖庸懦前勦辦江蘇粵逆凡遇堅城要地每多親往督攻蓋勦守賊與辦流賊情事本自不同況此時運防各軍已到者築牆紮營旣須就近督飭布置而直隸湖北浙江未到者尙有二萬餘人沿途催趲照應及將來調派抽替皆臣所當主持皆須在濟甯居中籌辦若遽舍之前進則五省各兵何所稟承運防門戶未屬膠萊咽喉未斷臣卽親往尙無裨益而於大局轉有妨礙兵事百變臣誠不敢謂運防旣成滅賊必有把握然立意已定

則經營尤須盡善此臣暫難卽赴前敵之實情也伏讀初五日

寄諭前敵各軍督兵大臣號令不及諸將進止不齊難免互相觀

望應否揀派威望素著大員統領前敵諸軍以一進止之處著該

大臣酌量辦理等因欽此查臣部湘淮各將久其戰陣素相輯睦

號令尚無不齊此次派兵入東臣因直隸提督劉銘傳深達機要

與潘鼎新同建倒守運河進扼膠萊之議曾令該提督就近察酌

前敵情形妥籌調派隨時會商丁寶楨協同東軍籌辦膠萊一帶

扼勒事宜俱使諸將力所能勉臣兩贖交催當不致誤一俟各省

調兵到齊運河膠萊兩防部署略定臣再抽選勁旅移營前往督

飭進擊以期聚殲總之此時大局先圖兜困此賊不求一時戰功

臣若令劉銘傳潘鼎新等追進登萊計亦可獲小勝驅之使出惟

念捻逆流竄多年數省生靈塗炭實胎

聖主宵旰之憂及今地利人力幸有可辦之機惟辦理須有次第
臣何敢避迂緩之名而不竭力經營顧彼失此貽誤全局仰懇
聖慈曲鑒稍寬時日以責臣效臣不勝悚切屏營之至所有微臣
辦賊大致現在情形暫難卽赴前敵先令劉銘傳就近商籌調派
各緣由恭摺由驛六百里馳陳伏乞

皇太后

皇上聖鑒訓示謹

奏

劉松山追擊張逆片

同治六年六月十七日

再劉松山一軍自四月初六至五月初三日節次追賊獲勝經臣
於五月十六日彙奏在案該逆自張村敗後退屯北五村南五村
等處劉松山李祥和仍會同郭寶昌黃鼎安住全福等軍於五月
初六日進攻賊巢奪村堡十餘處追斬五六百名賊由西北折而
東初八日由小咸店追至山村遇賊由南而東擊斃馬賊無數初
九日在大莊鎮分路進擊盡奪其巢至胡家崖地方擒斬五六百
人我馬略有傷亡該逆逃至武功適郭寶昌一軍先至截殺甚夥
遂渡渭東竄十一日各軍亦由咸陽過河時猶逆不與捻合已回
老巢十三四日由秦渡鎮三路進擊敗之石佛寺十五日又敗之
窯河村擒斬四五百名復由鄂縣北渡十七日我軍亦由塔耳寺
過河抵興平之張村劉松山適染時疾二十五日始拔抵咸陽詎

該逆踞武功數日又句合猗逆繞由涇陽三原向富平分踞流曲
王寮等鎮二十九日敗猗股於南都村六月初一日攻流曲鎮賊
潰遁殺至蒲城之蘇坊鎮斃五百餘名旋竄晉城鎮渡洛河入大
荔境內劉松山等恐其北竄韓邵窺伺河防初三日乃由蒲城疾
走朝邑苦泉鎮繞前截擊窮追至同州以西之高牆寨連奪村堡
十餘處斃賊六七百名獲軍械甚多我軍傷亡數十人賊復由洛
河西竄節據劉松山等呈報前來查張逆韓經痛挫與猗股倏分
倏合勢漸窮蹙但現尚有馬步二萬餘人恐非追勦所能盡殲已
令劉松山步步進逼勿稍鬆勁左宗棠入關後或當察度地勢另
籌兜圍之法其順字營哨官參將鄒得勝千總陳慶祥初三日力
戰陣亡應懇

天恩敕部從優議卹以慰忠魂謹附片具陳伏乞

奏
聖鑒訓示謹

賊入登州抽調運防隊伍摺

同治六年六月二十二日

奏為賊蹤竄往登州府屬飭催前敵各軍趕緊分紮膠萊河抽調運防隊伍馳往接應恭摺仰祈

聖鑒事竊臣籌辦堵剿捻逆業於本月十七日懋陳大略嗣接劉

銘傳潘鼎新函報任賴逆股於初九日由萊陽北趨招遠黃縣

境內劉銘傳十三日督軍行抵平度州之瓦廟口潘鼎新先於十

二日移駐掖縣之新河口會勘膠萊河道形勢南北海口相距二

百八十餘里惟萊州海倉口外沙灘又七八十里沙水沮洳萬難

築牆而人馬皆能逕渡潘鼎新擬除去海倉三十里由新河西紮

至濰河東岸水勢較深就平地築牆挖濠三十餘里設險限制其

自新河南至麻灣海口是為膠萊正河開段淤淺水深或一二尺

並有無水之處現與撫臣丁寶楨公同籌議因人數過單每營暫

守五里劉銘傳所部自新河南紮至大成寺一百一十里董鳳高
沈宏富自大成寺紮至吳家閘一帶約六十里東軍自吳家閘接
守至南海口約八十里俱於西岸增修長牆其濰河西自夏店至
海口水深泥淖亦未可空虛擬請東軍分守以補其隙劉銘傳潘
鼎新十六日來信均已督率勇夫及時興築須二十日粗就然後
逐細加工董鳳高沈宏富十六日始抵諸城十八九日計可到防
丁寶楨亦擬調回東軍各營分投趕辦臣慮其地廣力薄設賊悉
眾回撲牆壘未就猝爲所乘昨已抽調豫軍宋慶帶毅字十二營
山東平運防淮軍王永勝帶開字十營由宿遷運防分起馳赴膠
萊河會同劉銘傳等相機策應七月初間必可陸續趕到疊據登
州府縣稟報十一二日捻蹤仍游七福山甯海一帶聞通商大臣
崇厚已派洋鎗隊五百餘名防守煙臺口岸當不遽有侵擾若賊

在登境盤旋月餘我軍先後畢集膠河之防可固運河之守益嚴
臣再酌量抽替節節進勦斯爲穩著萬一膠萊布置未及周到賊
或乘閒突出而運河長牆漸就根基已固尙可嚴扼歸路徐圖收
拾是運防亦甚緊要目下旣抽宋慶王永勝兩軍東去自沈家口
至靳口八十餘里暫令豫軍張曜勻紫自灘上至韓莊百數十里
仍令李昭慶淮軍勻紫東境各段長牆粗有眉目蘇境亦正在興
工須俟湖北派出譚仁芳劉維楨二軍直隸派出張樹聲一軍到
後乃可再行設法抽派續赴膠萊臣當隨時察奪情形妥籌辦理
所有賊蹤竄入登境各軍趕紮膠萊抽隊前往策應仍兼顧運防
各緣由謹繕摺由驛馳陳伏乞

皇太后

皇上聖鑒訓示謹

奏

奏稿十一

五

膠萊河防已定馳赴前敵督勦摺

同治六年七月十八日

奏爲膠萊河防布紮已定捻逆急回山竄官軍協力堵守各省防
運之軍催調漸齊臣卽抽帶隊伍馳赴前敵督籌防勦恭摺仰祈
聖鑒事竊臣前將籌辦大略於六月二十二日專疏陳明拜摺後
卽親往東境運河上下周歷察勘督催修牆炎風烈日之中弁勇
晝夜興作勞苦異常酌加慰勞犒賞以作其氣七月初聞運西長
牆一律完整臣在沈家口舟次直隸臬司張樹聲由張秋過河稟
商知道省有梟匪滋事臣飭張樹聲勿庸南渡協守運隄速派余
承恩三營馳回大名先清內患所有沈口戴廟至靳口一帶運防
暫令豫軍張曜勻紮自靳口下至濟甯係淮軍周盛波劉秉璋分
地必須鄂軍譚仁芳劉維楨前來接替乃可抽調進勦據譚仁
芳等稟報行過光州大雨時作積潦偏地沿途沮滯七月十二三

日始抵歸德睢州等處臣復專弁持令嚴催務於二十日趕到以便抽隊換防蘇境運河最長李昭慶以十九營分守韓莊至貓兒窩一百七十里據報長牆已將竣工自貓兒窩至宿遷仰化集安徽撫臣英翰親督皖軍布紮亦有眉目漕臣張之萬清淮各軍橫守六塘河接至仰化集爲止但慮秋後六塘水涸難資設險飛調淮揚水師王鍾華魯洪達三營自宿遷以下沿運布紮並緘商浙江撫臣馬新貽酌派五千人昨准咨復已令候補道李耀南副將余朝貴統帶楚勇三千人備齊糧餉剋日北行擬仍添調水師兩營相爲依護實屬力顧大局該軍到後應自仰化集接守至桃源迤南並令隨時稟商漕臣就近察奪調度與清淮防軍互爲策應此籌商運防大致就緒之情形也膠萊河防自六月下旬銘鼎奇鳳四軍與東軍先後畢集冒雨冒暑趕築長牆劉銘傳統率諸軍

安商分紮七月初一日賊由卽墨回撲麻灣一帶丁寶楨督東軍
擊退嗣復折竄平度卽墨交界距淮軍汛地三四十里往來窺伺
劉銘傳會督各軍一面趕修牆濠一面派馬隊過河巡徼賊不敢
近初七日游騎駛近潘鼎新防所新河對岸一噉卽走初八九日
竄至萊州附近其被圍情急必圖乘間死撲幸豫軍宋慶於初三
日趕到填紮新河至楊家岡淮軍王永勝於初八日趕到填紮吳
家口一帶聲援較壯布置漸密似可無虞惟潘鼎新由新河橫紮
至濰河西岸自辛安莊北至海口尙空五六十里劉銘傳潘鼎新
暫派馬隊六營沿河巡哨仍須步隊扼紮聞王永勝到防後已騰
出東軍王成謙所部移守濰西昨據提督傅振邦呈稱黃河盛漲
距賊已遠直省撥兵分防嚴密該提督籍隸昌邑熟悉情形請調
該軍回籍會圍進剿等情先已函商丁寶楨應調該提督東去

當經批飭傅振邦卽率所部一千二百人馳赴濰西勸集團練協
力堵剿以資嚮導此籌辦膠萊河防大致就緒之情形也當賊初
入東時臣慮兵力未齊賊蹤飄忽膠萊防局難遽有成故須急辦
運防先杜回竄之路茲丁寶楨與劉銘傳等業將膠萊防務勻紮
周妥賊眾銳意竄撲自須添兵輪替進剿臣前奏擬俟各軍到齊
部署略定卽抽選勁旅移營前往昨又欽奉初九日

寄諭令臣斟酌情形親臨前敵督飭防剿現計鄂軍譚仁芳等二
十日內外可到臣卽督同劉秉璋周盛波萬餘人於二十一二等
日分起由濟南青州前進俟抵前敵再行妥細察辦法十則圍
之五則攻之從前連鎮高唐之長圍金陵安慶之困賊皆不過一
城一鎮需兵奚啻數萬茲查膠萊河自新河南至塔埠口已二百
六十里其中淤淺處甚多自新河橫出濰河北至下營又百餘里

加之南北海口沙灘亦須酌籌布置一隙稍疏卽虧全局守兵必
須五萬人分路進戰則又須三四萬人統計目下前敵各軍其力
實只能分守而不足進戰如果膠防稍有把握似須酌撤運防全
軍併往更番戰守庶可望就地殄滅此股昨准英翰函稱擬派得
力統將帶萬人馳往助剿臣已緘復允行若仍不敷用當再相機
酌調惟海隅窮僻購糧維艱人多食少飢乏可虞耳至

諭旨慮及逆賊勾結匪徒入海及洋人接濟軍火此誠不可不防
臣先已函致丁寶楨以洋人軍火來路甚遠煙臺口岸甚小素少
購藏但責成東海關道嚴密查禁當不致有大批接濟捻匪搶船
勾結入海若於賊近時細心防範外來商船不許傍岸本地船戶
飭令移泊亦地方官力所能爲之事卽使窮極入海必不能千百
成羣捻患在聚而不在散卽使兇渠開有漏網各口岸認真查緝

亦不至爲大患所慮者膠萊防軍不厚或秋後河涸潮枯該逆仍
乘閒突出雖戰勝亦難蔽事此臣所私心惴懼而不敢不竭力籌
維者也所有膠萊及運河兩防布紮已定臣卽抽帶隊伍馳赴前
敵督籌防勦各緣由謹繕摺由驛六百里馳陳伏乞

皇太后

皇上聖鑒訓示謹

奏

劉松山追剿張逆屢勝片

同治六年七月十八日

再劉松山一軍自五月初六至六月初三日節次追賊獲勝經臣
於六月十七日彙奏在案該逆東竄未遂仍竄過洛西踞蒲城之
北賈曲槐德寶村等處六月初四日劉松山李祥和率隊與郭晉
昌一軍冒雨過河初六日與黃鼎安住全福各拔隊進攻賊棄巢
且戰且走至蒲城之高都村擒斬百餘名全股遁往富平初十日
各軍進抵渭南之夏集一帶十一日賊由孝邑鎮北折而西十二
日我軍進至蒲城之號同鎮賊又竄蒲城以南十三日由樊家村
分數路搶奪賊巢賊拚死衝撲劉松山等督隊橫截斃賊數十賊
潰追至洛北村共擒斬五百餘名弁勇亦有傷亡十五六日由青
銅鎮追至田市村賊又竄蒲城以東十七日抵和睦村以軍士冒
暑多病安頓數日二十九日仍會師進張村探賊在蒲城之高閣

馮家村等處七月初一日分路擊之追至雙家埠賊敗遁羅家莊
擒斬三百餘名初二日各軍進佔賊巢該逆被勦狂竄乘勢掩殺
至興市鎮賊疾走富平之大王村見頭昌甯村等處初三日各軍
起至索家地方遇賊大股擊斃數十名時賊方麇聚昌甯村各軍
分三路衝擊賊奪路奔竄自相擁擠跌落溝坡而死者甚眾直追
至富平之何家莊其前後斃賊六百餘名生擒頭目屈中喜趙起
新等當卽正法該逆向西南敗去節據劉松山等稟報前來查張
總愚一股近因涇渭洛水漲發游弋蒲富高涇等境屢勦屢敗逃
散頗多左宗棠進駐潼關正可扼斷東竄豫鄂之路或能設法兜
圍就地殄除劉松山轉戰經年弁勇勞苦飢饉疫病繁興實堪憫
念臣批令隨時蓄養士氣卽師進佔共收聚殲之效和字營哨官
都司楊輝玉十三日力戰陣亡老湘營哨官參將熊開雲游擊李

玉喜外委曾顯祥和字營于總羅蘭軒等四名初三日追剿陣亡
應懇

天恩敕部分別從優議卹以慰忠魂謹附片具陳伏乞

聖鑒訓示謹

奏

賊山濰河搶渡相機調度摺

同治六年七月二十八日

奏爲捻逆由濰河北口海神廟搶渡據報由昌樂臨朐境內南趨
臣行抵濟南現擬改道泰安南下相機調度並籌顧下游進防恭
摺仰祈

聖鑒事竊前因膠萊河北路海倉口沙灘不能築牆橫接西面濰
河設守及臣抽帶隊伍馳赴前敵各緣由疊於六月二十二七月
十八等日具奏在案膠萊河自王永勝一軍到防騰出南路東軍
王成謙所部於十三日拔往濰河西岸南接潘鼎新守地北至下
營三十六里僅敷布紮下營以北沙灘最淺者尙有魚里鋪至海
神廟十餘里王成謙又商派原紮辛安莊之東軍已革總兵王心
安平字四營移守該處劉銘傳等因有步隊填紮遂將巡哨馬隊
撤回原防先據豫軍宋慶稟報十六日五鼓賊馬步大股猛撲該

軍所守新河地段拚命衝突經游擊蔣尙鈞千總程允和抽守牆
勇丁四百人繞出賊後夾擊斃賊甚多生擒毫捻老賊三十餘名
奪獲騾馬四五百匹追奔二十餘里實屬異常出力賊眾旋向萊
州西北竄走計自月初賊撲南路長牆經東軍擊退後疊犯劉銘
傳潘鼎新守地至此已非一次該逆知膠萊河二百餘里牆堅濠
深守禦嚴密無懈可乘乃有圖渡濰河之意疊准丁寶楨來函及
前敵各統領稟報膠萊防務大致就緒惟地長兵單亟須添人協
助適鄂軍譚仁芳劉維楨等於十九二十日均抵濟甯臣當令星
夜接替迤西靳口至安居防務飭催劉秉璋周盛波兩軍於二十
一日起程臣卽於二十二日由濟甯州督隊進發冒雨兼程二十
六日馳抵濟南忽接東軍道員王成謙稟稱二十日辰刻捻逆全
股由海神廟以北十數里外海灘撲渡濰河王心安卽率四營馳

往堵勦揮軍力戰陣亡營官胡祖勝一員哨弁七八員勇丁六七
百名王成謙得信後亦率親軍蔽隊會同鼎宇營馬隊馳援賊已
據渡過河奮擊移時斃賊數百名賊急向西南狂奔王成謙卽拔
營追賊等情潘鼎新劉銘傳二十一日聞信董鳳高王承勝沈宏
富二十二日聞信先後均拔全隊緊躡而西水師提督徐道奎稟
稱在昌邑晏家集遇賊擊退二十一日該逆竄至濰縣二十二日
潘鼎新王成謙追至濰縣賊竄昌樂東南鄉二十三日分股由安
邱臨胸南竄其勢將趨東境之沂莒蘇境之贛榆清口查濰河自
辛亥莊北至海口尙空五六十里臣前於十八日摺內奏明緣濱
海潮汐尙大據報沙灘深淺不等水約五六尺莫可支持旬日以
待臣軍續至再行勻布臣於甯陽途次方批令王成謙多紮一二
十里並檄催提督傅振邦速赴濰西勸集民團協守海口臣傅振

邦先經丁寶楨調勦直隸梟匪未得回軍且皆緩不濟急臣慮防
軍單薄賊仍乘閒突出日深惴懼不意賊匪搶渡如此之速其濰
河海神廟以北地方係東軍王心安相近王心安前守運河戴廟
五月間曾經失事此次僅帶四營分守要地據王成謙稟稱該革
鎮前經築營尙無河牆眾寡不敵似亦實情想丁寶楨必已奏參
臣忝任督師中途聞報愧憤交集應請

旨將臣交部議處臣初意膠萊河防難成專力注重運防嗣聞膠
防漸有頭緒是運防輕而膠防重先抽宋慶王永勝萬餘人前去
今又調劉秉璋周盛波萬餘人偕行運防乃愈抽愈空亦愈難守
賊既由濰河突竄南趨清口必圖猛撲運河查運防自韓莊以下
李昭慶以十九營守至一百七十里兵力極單宿遷仰化集下至
桃源僅有水師前調浙軍三千人協守尙未到防目前膠萊各軍

及臣部均落賊後若賊猛撲竟無把握盪淮漕臣張之萬函稱自
桃源東至海口五百餘里兵力斷難敷布現在六塘河水勢正漲
已派水陸各營分守但秋後日漸消涸賊氛逼近處處喫緊亦須
設法籌顧臣即日督同劉秉璋周盛波由濟南改道逕赴泰安沂
州一帶就近察度賊蹤督飭各軍分投堵剿並察看下游運防空
虛之處酌量添兵協守未知能否趕及殊深焦慮所有捻逆由濰
河北口出竄臣行抵濟南改道泰安南下督勦緣由謹繕摺由驛
六百里馳陳伏乞

皇太后

皇上聖鑒訓示謹

奏